

**Kouvertir ek Miz-an-paz par:
PHILOMENA LUCAS-DEWEA**



**PIBLIYE PAR LENSTITI KREOL,
LAKAZ SEN ZOZEE, 0 KAP, 2003
©LENSTITI KREOL.**

**ENPRIMEN PAR PRINTEC PRESS HOLDINGS
VIKTORYA**

ISBN: 99931-50-82-4

Mon Dester



Reuban LESPOIR

Mon Destein

Reuban LESPOIR

**Kouvertir ek Miz-an-paz par:
PHILOMENA LUCAS-DEWEA**

**PIBLIYE PAR LENSTITI KREOL,
LAKAZ SEN ZOZEF, 0 KAP, 2003
©LENSITTI KREOL**

**ENPRIMEN PAR PRINTEC PRESS HOLDINGS
VIKTORYA**

NOT LO LOTER



Reuban Lespoir i en zenn garson 25 ki reste Les Mamelles. An se moman i pe swiv son letitid kot Lenstiti Nasyonal pour Ledikasyon, pour li vin en ansenyan.

Reuban, ki ti konmans ekri a laz 16 an, i servi en melanz leksperyans, rev ek lemosyon dan son bann travay. I dedye sa koleksyon a tou son fanmiy, zanmi ek koleg, e tou dimoun ki'n donn li okenn siny lankourazman. I promet ki i pou touzour kontinyen ekri.

KONTENI

Lentrodiksyon	iii
Ansanm	1
Donn mwan ou lanmen	2
Poet	3
Lespwar	4
Kare	5
Fourmi	6
Mwan	7
Ou	8
Nou'n fer li!	9
Dez-er-edemi	10
Lavantir mwan lanmen	11
Koko-d-mer	12
Bib	13
Mon Senfoni	14
Pa fini la	17
Lorer!	18
Mon Larepons	19
Mon premye roz	21
Les mwan vin ou poet	23
Meakoulpa	24
Adolesan brize	25
Mon desten	26
Ant lavi ek lanmor	27
Refren papa	29
Dan bis tata	30
Paradi	31
Kameleon	32
Sa landrwa	32
Mon ti en lesklav	33

LENTRODIKSYON

Sa lemonn i bouleverse, i anmer avek problem, maladi san gerizon ek lager. Bokou nou ozordi in degout lavi. Me mwan mon enn parmi bann ki'n deside pour pran en moman pour penn e desin atraver mo bann zimaz, bann lemosyon e bann temwanyaz ki donn lavi son vre sinifikasyon.

Alor mon envit ou, pour vin avek mwan e pour partaz sa ki mon pe ofer. Mon envit ou dan mon liniver, pour ou vin santi sa ki mon'n vizyonen e santi dan bann diferan sapit mon lavi.

E si, sa ki mon'n ekri i met en sourir lo ou figir, si i fer ou konn en lazwa inoubliyab, si i fer ou eksperyans en santiman ineksplikab e pour en senp lenstan fer ou vin spesyal, si ou mazin lezot plis ki ou menm, si i fer ou sagren me osi ranpli ou leker avek lespwar, alor ou ava dakor avek mwan, ki sa se '**MON DESTEN**'

Mersi zot tou e bon lektir!

Ansanm

Atraver poezi bann fler ek larivyer

Mon'n rekolte sa bann mo

Dan rev en inosan

Mon'n ekrire sa lapriyer,

Sa mesaz

Pour ou

Ki marse dan soulye en mandyan

E ou osi

Ki'n prefere lev ou lanmen pour tape

Ki ede

Ki'n prefere ekoute ki tande

Ki'n bous lizye... oubliye

Plito ki defann limanite

Mon pa la

Pour montre ledwa

Me mon pe fer pase sa mesaz

Sa laflanm ki senboliz linite

E mon pe dir

Non... plito mon pe demande

Ki ansanm

Nou efas listwar

E fer defet vin laviktwar

Ansanm annou fer larm vin sourir

Akoz lape

I osi presye ki en bizou

I osi tann

Ki en kares lo lapo
 I osi dou ki de lalev pe
 Anbrase
 E ansanm annou feyte dan paz nou leker,
 Fouray dan profonder nou nanm
 Annou met sa dernyen zefor
 Annou fer sa diferans
 Pour ki nou pa pou bezwen kriy lape
 Lo en lot kote lorizon
 Me ansanm nou a les lape gid nou
 Ver nou desten

Donn mwan ou Lanmen

Donn mwan ou lanmen
 La bezwen vir deryer
 Donn mwan ou lanmen
 Ou pa ni premye
 Ou pa ni pou dernyen
 Donn mwan ou lanmen
 Se ou ki demen
 Donn mwan ou lanmen
 Ansanm nou ava priye
 Ki lemonn i ava sanze...

Poet

Son lank i penetre
 Paz apre paz i vire
 Lekritir i marke
 Mo i vwayaze
 Papye i sanze
 Memwar i groupe
 Lide i rekolte
 Lanmour i gide
 Lizye i fikse
 Zorey i soufle
 Ledwa i vize
 Lespri i konfize
 Pasyon i temwanyen
 Lemosyon i sansire
 Kestyon i ganny poze
 Sekre i ganny deuwale
 Lemonn i konteste
 Lanatir i aksepte
 Poet i defye
 Poet i sakrifye
 Poet i kontinyen kree
 Son zefor i entansifye
 Son pasyon i multipliye
 Pour premye fwa
 I santi li parfe...

Lespwar

Mon'n priye... me anven
Mon'n kriye... me sitan lwen
Marse... katpat parey en fou
Pe rod sa pti parol dou
Bokou in fer mwan sourir
Me bokou plis in evanouir
Kwense dan koridor sa bann moman
Mon esey sezi
Tou sa ki'n fini anvole dan divan
Mon leker touzour blese
Parey larivyer... disan i koule
Me mon nanm i sitan paralize
Ki i nepli santi lefe
Bondye... ou ki'n temwanny mwan
Pe anmenn mon lakrwa
Silvouple donn mwan sa lespwar
Pour ki en zour mon ava posed sa enn
Ki mon ava apel 'pour mwan'
Sa enn ki li osi i ape plere
Dan mouswar en mandyan
Pour ki ler tou i ava fini
E lalimyer, lespri ek lapousyer i reini
Mon pa pou bezwen demann pardon
Akoz mon pou'n fini ganny kriye
Lo lot kote nyaz par mon non.

Kare

Parey en lasirenn
Sa kare i monte
Avek mare o
I ranpe dan disab
2.4.6 pa
son traze fek konnmanse

I pyose
E i fer monte
Son lapat konnmsi en lapel
Son lizye i fikse
Parey en latres
Ki'n fini ganny demarke

Prezan nek i large!
10.20.30...par voyaz
ler i'n fini
I kouver

I desann
I pagaye dan disab
Ziska laroul i vin zwenn li
Fer krwar ou bat ou lizye
Me li in fini disparet ...

Foumi

*Mwayen, gro, pti
Nwanr, rouz, gri
Zot monte... Zot desann
Dan lakwizin... dan lasann
Kot i annan loder
I anlex... i ater
Zot rode... zot goute
Me zanmen zot tousel
Sa ki reste
Zot anmenn lo latet
A de... a kat
I fer fermal
Zot bann pti lapat
Zot ise... zot bose
Zot pa vin zwe!
Sa pti lagrenn
I lour parey en bal dipen
Me nanryen pa ganny fer
Si napa douler
Zot tolere
Si zot arive ase!*

Mwan

*Mon'n swiv lalin
Mon'n swiv zetwal
Pour esey ariv sa landrwa
Kot zonm pa'n zanmen poz lipye*

*Mon'n penetre lespri
Mon'n penetre leker
Pour akonpli sa ki enposib*

*Mon'n anvair bann rev
Mon'n anvair bann fantezi
Pour konpran
Profonder limazinasyon imen*

*Mon'n ekoute
Mon'n esey desifre
Me mon trouw mwan bokou fwa
Pyeze dan mon prop panse*

*Mon'n analize
Mon'n aksepte
Menm si mon'n dekouver sekre lapoezi
Menm si mon pe adousir leker
Avek bann mo rekonfor
Nanryen pa serten
Mon pa ni envensib
Ni imortel
Me vilnerab parey nenport ki...*

Ou

*Bondye ti anvoy ou
Pour mwan
Ou'n vin mon tou
Sa ki mon ti santi
Sa moman
Mon pe ekrir ozordi
Konbyen rev ou'n donn mwan
Ozordi mon devwal
Tou mon santiman
Kantmenm mon fer li dan rar
Ou'n touzour
Mon lawwa
Presye parey bann zetwal dan lesyel
Ou mon tou... ou mon en sel
Se ou mon lenspirasyon
Avek ou
Mon'n temwanny vre lanmour ek pasyon
ki sa
ki pou fer nou dekouste
mon pa anvi trouwe
plito annou mazin
tou sa ki fer nou parey
delo ki glise lo fey
senbol tou sa ki nou annan
dan mon leker
ou pou touzour
pour mwan
kekfw divan lavi i ava separ nou
me mwan
mon pou touzour kontan...*

Nou'n Fer Li!

*Lebra klase
Ranpe... katpat
Nou'n tonbe... nou'n leve
Apenn dormi dan liu
Pri dan kaye
Toufe dan papye
Kabose...bwete
Nou'n priye
Ire!
Kriye... "Ar wi Bondye"
Me ou a dir
Letan i per pour pase

Grenpe... bwete
Kabose...vekse
Depanse... akimile
Nou'n tolere... nou'n sirmonste
E ler ou a krwar
Nou'n war en pti laklerte
Letan i degaze i taye!

Me la nou la devan laport sikse
Tou nou difikilte in ganny maske... toufe!
Nou en pa pli pre avek nou desten
En lawwa
Pli for... en dernyen zefor
Nou mars la sa semen
Pe sant sa pli zoli refren
"Nou'n fer li..."*

De er edemi

*Ekri zot dat
Ase donn mis latak
Pol, aret kopye
Mari, get dan ou kaye
Asiz zot byen
Laklos pre pour sonnen
Degaze,
Kopye travay lakour
Pa bliye demen pour dir bonzour
Sa ki mal...efase
Prezan ferm tou kaye
Lekritir fodre i prop
Pour pa fer fot
Regard byen tablo
Sa ki'n fini met sez anler
Annou fer en pti lapriyer
Sa ki netwaye pa bliye reste
Trwa er pe sonnen
Si zot ariv tar
Manman pou gronnyen
E pa bliy sa gran roten...*

Lavantir muwan Lanmen

*Msye Zanvye
I met son soulye Fevriye
I tap son afro Mars
E aranz son kravat Avril
I get pour ankor enn fwa dan laglas Me
E dir
"ou a pou muwan Zen"
I vir son sapo Zilyet
Touskifo pour son palto Out
I benny li dan lesans Septanm
E anbarik dan son mersedes Oktob
'pip-pip-pipp'
I ornen toudilon semen Novanm
Pour tou bann zenn fiy konnen
Ki li i pe al lafet Desanm*

Koko-d-Mer

En moniman parfe
Stati dan en zarden mazeste
Devwalan... en sekre byen kapte
Zistwar... lanmour pli sakre

Perse dan mon rev
Roman Adan ek Ev
Pinisyon premye pese
Pour touzour... zot pou debout dekode

Noye dan basen sediksyon
Serpan... sa premye pwazon
Tantasyon ti fer zot komet en fot
Kan Bondye ti'n beni zot

Pli gro nwa
Levidans... zot ti mank lafwa
Fri dezobeisans
I anmenn pwa zot santans

Si selman... i ti kapab eksprim son linosans
Me i zis... en orfelen san defans
Antoure par mister
Pouse lo later... rekolte lo lanmer

Laba kot i ti ganny ratrape
Sa lezann... koumsa ti konmanse
Lesklav leksplwatasyon

Sete sa son koreksyon

I ti pe sey sove
Me son desten... i fors li peye
Bani dan son paradi
Parey en fri defandi...

Bib

I pas difil isi
I pas difil laba
I azout en pti bout isi
I azout en pti bout laba
I'n fini
Prezan i bon pour al kasyet
Taler i a bezwen ganny enn
En mous zonn, en mous dimyel
Zot a bezwen tonm dan sa pyez
Ki mon ti dir
La enn in pri!
I degaze
Son wit lapat i vire parey lelis
I anvlop li dan son difil
Touf li,
Met laba pour letandir
Non i pa en koudriyez li
Me zis en bib byen rize...

Mon Senfoni

*Sirondann
Mon debouse dan karo kann
Pour konmans ekrir... mon senfoni
Sa senfoni
Ki komans avek son domino
Ki desir latah
Kot lafimen taba
I polye labarib granpapa
Mon ekrir mon senfoni
Avek son... lansi
Kot moulén pe kraz kann
Dan leko sa tanbour moutya
Sofe dan lalin kler
Mon ekrir mon senfoni
Avek melodi podsann dekoke
Ki kriye lo plans
Mon senfoni ki valse lo ler madann karozen
Ki fer desann sa ladob friyapen
Bennyen dan loder lafimen
Sa vye marmite lafont
Mon senfoni
Ekrir avek disan lesklau
Lasaler kalorifer!
Kot mon lank i pers mon papyé
Parey defen Tonpa
Ti touzour dekok sa bonm
Mon senfoni
En pyes ranpli avek limour
Poezi ek soufrans*

*Ki salye lizour
E beni lannwit
Sakre parey bann sapit labib
En vizyon ki'n pers lesyel
E rann lapel dan mon memwar
Mon forse!
Mon leker avan mon lespri
Devan en lorkes Napoleon
Mon temwanny sa ki ti'n ganny prewar
Wityenn zour kreasyon
Kan Kastor
Ti ape plenny son sor
Bondye ti beni li
Sa soulazman son soufrans
Ki'n diriz li lo semen lazistis
Prezan i maske lorizin avek son lafyerte
Lanblenn son lidantite
I les naze dan divan
Avek tou en lanpler i evok laviktwar
Ozordi
Nou tou ki la
Nou konnen vreman ki nou ete
Poul ponn dan pikan
Sakenn son moman
Kreol... wi Kreol
I pa en verb konpoze me plito i en let... Ekrir
Pour rann omaz nou bann ero
Bann gardyen nou leritaz
Fofile lo en tabliye
Ki'n vir paz listwar
Nou pep*

*Ki enn fwa ti bann latonm abandonnen
 Dan en simityer izole
 I ozordi bann moniman senbolik
 Ki retoun nou dan lefase
 Ki fer nou apresye
 Nou valer... nou kreativite
 Nou bann lenspirasyon
 Ki ti'n toufe dan po lank
 Nou bann lemosyon
 Maske dan batman nou poumon
 Ozordi nou eskploz avek uiger
 Mon parol i nepli lapousyer
 Me in sezi leker
 Nou febles i fer nou for
 Mon senfoni
 Mon senfoni Kreol
 Se li mon laverite
 Se sa ki mon ete
 Sa lasenn ki ti rezonnen lo lapo!
 Zenerasyon apre zenerasyon
 Nou zanset in kiltivite
 Apenn tonm azenou e kriye
 Zot benediksyon i sa zarden
 Kot nou lalang pe fleri
 Mon dir ek ou
 Non!
 Non ou ki pa konn sa zistwar
 Non... ou ki pa konn sa soufrans
 Me ou
 Ki annan lodas montre ledwa
 Mon ofer ou mon senfoni*

*En morso an silans
 Ou pa ni bezwen konpran
 zis fer parey muan
 Met ou leker avan ou lespri
 Apre demann ou lekor
 Si ou konnen
 Vreman ki ou ete...*

PA FINI LA

*Konbyen fwa mon pou rakont ou
 Zistwar sa zonn sou
 Konbyen fwa mon'n plenngyen
 Sor sa zanfann orfelen
 Konbyen fwa mon pou resite
 Poenn sa leker blese
 Konbyen fwa mon pou sante
 Sanson sa lanfans brize
 Sa bann mo i pour zot
 Non, zot kreasyon i pa en fot!
 Zis mazin
 I annan demen
 Lavi pa fini la
 Nou ankore annan sa sans pour fer en lot swa
 Bokou pou anpes nou
 Lezot pou esey detri nou
 me lavi i presye
 Annou viz nou regar ver lesyel
 E esey konpran tou
 annan en dimoun ki ankore kontan nou...*

Lorer!

Loraz i frape
Zekler i eklate
Sa zonm sovaz i penetre
I'n met en'stim', son latet i vire
Manman pa kapab dir li nanryen
Sansan i pou bezwen
Konn douler sa bann gro koudpwen

Baba dan ber pe plere
Larm latrites i devide
Dan en kwen lezot i sey sere
Me zot lafreyer i fors zot kriye
Selman nanryen pa sanze

Vyolans i ogmante
Kouraz i ganny abize
Betiz i ganny esanze
Manrmay pe ekoute
Zot lavenir pou brize

Me ki zot kapab fer
Zot pou bezwen soufer
Lalkol in'antre dan zot liniver
E pe diriz zot ver lanfer...

Mon Larepons

Petet i par en rev
Petet i lo lezel en vev
Ki swa i dan lesyel
Ki swa i par en larkansyel
Soufrans mon bann frer
I rezonn dan tou kwen mon leker
E si ou ki pa konpran sa
Si ou ki pa'n deza tann zot lauwa
Ou demann mwan aköz
Ou ziz mon laköz
E dan tou lafoli
Ou prop poezi
Ou kestyonn mon lekritir
Dout swa mon literatir
Petet i zis en reaksyon imen
Pour rod larepons dan tou kwen
E si mwan
Mon swazir sa moman
E mon dir ou
Pour get otour ou
Kot lariwyer i koule trankil
Kot sa ki sipoze pli feros
I sitan dosil
Dan losean
Kot sa ki pli feb
I ganny devore par sa ki pli mesan
Kot roz i ankör fleri avek pikan
Me avek en parfen pli eblouisan kot fler i sitan zoli
E lapousyer i evok bann ansyen lespri
Kot lapli i netway bann zarden
E zetwal i devwal sak desten
Kot diwan i skilpte lenspirasyon
E labrin i soulaz tou fristrasyon
E si pour ankör enn fwa
Mon diriz ou dan sa lepa

Kot nyaz i garni lesyel
 E sak parol i dou parey dimyel
 Kot lalin i diriz fernwanr
 E sak zistwar i rakont batay
 Ant blan ek nwanr
 Kot montanny, vale, kolin ek tou son leokri
 I donnen e pran lavi
 Kot larkansyel i anmenn lespwar
 E bann lauwa enkoni i sant laviktwar
 Kot soley i salye lizour
 Kot sigal i zwe gitar
 E golan i sant en "zoli zour"
 E si mon ensiste
 Ki ou pa fer nanryen plis eksepte ekoute
 Kot lanmoure i konfese
 E romans zwazo i geri tou leker blese
 Kot bann latonm fele
 I ekrir poenm bann ki'n touzour plere
 Kot later in berso bann kadav
 E simityer dezerte in delivre bann lesklav
 Kot pli gran mirak lavi
 I devwal dan tou bizou lanatir
 E briye dan sak sourir
 Kot pwisans en sel lanmen
 I enn pli gran ki tou potansyel imen
 E si apre sa moman
 Ou santi ou diferan
 Si sa lekspedisyon
 In briz tou ou persepsyon
 E si atraver mon bann parol ki mon konesans
 I sa larepons
 Mon ava admet
 Mon en poet...

Mon Premye Roz

Kouler mon leker
 Labote... sirpas tou grander
 Anvlope dan tou en lanpler
 Ki evok en sel lasaler
 Lo lorizon... mon al respir sa lafreser

Petal mon senserite
 Parfen mon fidelite

Ou menm mirwwar sa enn ki mon'n toultan kontan
 Refleksyon sa lanmour
 Pli pwisan

Pasyonnen par ou perfeksyon
 Anprizonnen dan ou benediksyon
 Dan ou... mon trouv mon lenspirasyon

Mon metriz ou non
 Refren pli zoli sanson
 Mon dekri ou lanblenm
 Tit mon premye poenm
 Mon sant ou labote imans
 Vers sa pli zoli romans

Kimannyer mon pou devenir
 San sa laform ki resanble ou sourir?

Konbyen fwa ankor mon pou pler lepace?

Fer mwan war realite

Eski i vo reve?

Sa enn ki parey ou

Sa lanmour fou

Sa leker dou

Ki mon pou fer san ou!

Dan tou mon rev perdi

Dan tou mon lespwar... bani

Se dan ou prezans

Ki mon trouv valer legzistans

Mon vre bizou

Senbol sa lanmour

Ki'n kares lizour

San bezwen demann kestyon

Dan tou doutans ou kreasyon

Ou larepons... Mon solisyon

Ou perfeksyon

I mon lenspirasyon!...

Les mwan vin ou poet

Les mwan vin ou poet

Kan limanite

I efas mon poezi

Les mwan vin ou poet

Kan vale... kolin... montanny

I refize donn leko mon bann mo

Les mwan vin ou poet

Kan lavi i ranpli avek doutans

E mwan mon'n perdi,

Pe drive dan losean literatir

Les mwan vin ou poet

Pour anvair ou laswaf

Avek sours mon lenspirasyon

Les mwan vin ou poet

Pour mwan soulaz ou leker

Avek tandres mon panse

Les mwan vin ou poet

Les mwan fer ou konpran

Lafoli mon literatir

Les mwan vin ou poet

Les mwan fer ou penetre

Baryer mon nanm

Pour ou vin pa zis mon lenspirasyon

Me mon legzistans

Meakoulpa

*J'n maltret ou pli ba ki later
Me ou dir
Sa i arive par ler*

*J'n abiz son kouraz la ou
Me ou dir
J zis en pe sou*

*J'n fini detri tou sa ki ou'n konstrir
Me ou dir
Se sa lavi*

*J'n vers ou larm ek ou disan
Me ou dir
J pa pou ariv toultan*

*J'n bles ou leker
Me ou dir
Se ou ki pa ti senser*

*J'n fer ou troup vizyon lanmor
Me ou dir
Pa pou ariv ankor
J'n fer ou kriy 'osekouri'
Me ou dir
Se sa vre lanmour*

J'n fini fer son lot swa

*Me ou dir
Ou ankor pe dir
Meakoulpa, meakoulpa
Meamaksimakoulpa!*

Adolesan Brize

*Ou sousi skilpte lo ou fron
I separ ou lespri
Larey en laliny simetri
Ou ankor zis en petal
Me deza ou pe anmenn en nouvo fri
Dan sa monn*

*Dyeze par ou prop linyorans
Ou'n negliz ledikasyon
Prezan ou troup ou perdi
Dan ou bann fo kapris
Dan en lanvironnman kot ou'n ganny ofe
Elis soufrans ki sipor*

*Konbyen liye ki'n afèblir
Dan ou prezans?
Konbyen lespri ki'n trouble
Le pas nenport ki zizman?
Me ou pa ni premye
Ni demyen
Pour travers sa santye ki paret en larout kler*

Ou fitir

*En fini ganny anpape ou pase
En solisyon
Ankor touzour en pwen kestyon*

*En fwa inosan
De fwa koupab
Ou fors ou larantre
San prizon adilt
San menm travèrs zarden adolesan*

Mon Desten

*Mon ankor pe tande
Mon ankor pe esey memorize
Leko sa bann mo imortel
Refren sa bann ve eternal
Kot ou'n eblouir mwan avek ou lekritir
Aprezan menm si ou lwen
Les mwan ekri
Pour rann ou laparey
Les mwan ekri pour partaz mon lenspirasyon
Les mwan ekri
Pour mwan senpleman dir
Dousman tou dousman
Katpat
Parey en pti zanfàn ki pe aprann marse
Mon ava tyonbo mon bolpenn
Ser li pli for ki zanmen
E konmsi pour premye fwa
Mon ava form mon bann let
Sali mon papye avek mo reye e karikatir
Mon ava ferm mon lizye*

*Les mon leker anvole
Ziska mon nanm i leze
Mon ava ekoute
Mon ava ekoute
E si sa laverite i apel mwan
Mon a pran sa semen
E mon a diriz ver mon desten
Si mo i mon konplis
Si lank i mon zanmi
Mon pa pou per pour fer fot
Mon a dir tou
San dir tou
Kot mon'n ganny anbadonnen
Kot mon'n ganny anprizonnen
Lekritir i ava korize
Lekritir i ava konsòle
San get mon kouler
San get mon grander
Mon ava ekoute
Mon ava ekoute
E si sa laverite i apel mwan
Pour ankor enn fwa
Mon ava kontiny lo sa menm semen
E mon a diriz ver
Mon vre desten*

Ant Lavi ek Lanmò

*Soley i briz baryer lorizon
Parey en roz
Ki salye lizour
Dan en silans total
En leokeri persan*

I rezonnen parmi bann montanny
 Zonn i pran fri son matirite
 E ofer li avek lesyel
 Konmsi en labouzi
 Dan lobskirite total
 Zannan i briye
 I ranpli avek lavi
 Son desten pour ofer li
 Ankor plis lavi
 Nou war... nou santi
 Nou konnen
 Me dan lot kote lorizon
 Dan en kwen
 Parmi debri ek pourtir
 Silans labandonnman
 I kriy bokou pli for
 En leker frazil
 Viktim en aksyon sovaz
 I war li tousel
 Lafreyer pou sas li
 Latrites pou zwe kouk
 Ek li
 Sida pou aterir lanmenm avek li
 Lafamin pou sifok li
 Son desten se lanmor
 Nou war... Nou konnen
 Me li i inosan

Refren Papa

*Zot in sant bann romans
 Letan zot in perdi konfyans
 Zot in soufle dan zorey
 Pour rann laparey
 Zot in ekrir poenm remersiman
 Me toultan zot in dir "manman"
 Me li in la
 Pe anmenn son lakuwa
 Pe ekrir son refren
 En labili dan son lanmen
 I pe sey desifre son legzistans
 Pe kalkil son lenportans
 Li ki kapab fer sitan bokou
 Me lapliparditan i'n swa fou
 Oubyen sou
 Konbyen ki'n fistre... Vekse
 Konbyen ki'n kritike... oublie
 Me li i pa en poet
 Me i ekrir pour admet
 Akoz wi i'n kasyet
 Wi i'n disparet
 Me eski ou
 Ou'n donn li tandres
 Ler i'n tonm dan basen febles
 Eski ou... ou'n donn li en lot swa
 Ler i'n fer en fo pa
 Akoz dan plas koz li mirak
 Akiz li i serwi larak*

Akoz ou pa anbras li
Antour li... kares li
E zis pour en pti moman
Oubliy sa ki'n pase oparavan
E tyonbo son lebra
E dir li dousman
Mon kontan ou... Papa!

Dan Bis Tata

Dravyer i donn tiket
Bann ki pti i taye
Pour ganny en plas asize
'madanm met li lo ou
lenspekter pe fer sa larout'
Pola ek Fifin i konverse
Bann ki zenn
I kas bann gran riye
Aret devan!
Dravyer si ou pa tandé...kankan!
Bann ki debout tyonbo for
Si aksidan
Dravyer ki pou annan tor
Annou konport nou
Pa anbarke si ou sou
Ar zisteman
Mon debark la devan
Pa i gou dan bis tata
Konmsi i'n fann tou ou traka!...

Paradi

Mon ankor pe priye
Mon ankor pe reve
Sa landrwa...sa labote
Partou kot mon vire
Se li ki dan mon panse
Son non ler mon leve
Son leker laba kot lanmer i tous lesyel
Bann ros ki klate parmi laroul
Bann gren disab ki form en gran lafoul
Paradi i pa en rev
Non, plito i en mervéy
Kote i ete?
Sakenn pe seye
Me i pa ni tro lwen
Plito zis dan en pti kwen
Kot nou leker i bat pli for
Kot zwazo i plenmy son sor
Non, pa avek larm
Non, pa avek zarm
Me avek bann melodi
En bon reset pour larmoni
Paradi
I pa en vye sanson oubliye
Ni, en vye paz dan en liv desire
Paradi, i mon zanmi
Mon fanmy... e ou osi
Ki kriy mwan "lennmi"
I tou sa ki mon annan
I tou sa ki mon pou toultan kontan...

Kanmeleon

*I vin ver
I'n bezwen war son bann zuver
I vin rouz
Manke i ankoler
I vin zonn
Manke lasaler
I vin ble
Sirman lafreser
I vin gri
Manke, par la i annan en loder
I vin nwanr
Manke, sa ki i'n manze i anmer
I vin tou koulèr
Sa, se akòz son laferyer
I pa vantèr li
Non, sa en don Bondye in donn zis li
Son kanmouflaz
Sanmenm son sel kouraz...*

Sa Landrwa

*Konbyen fwa
Kot sa landrwa
Nou'n pase... nou'n koste
Nou'n karese... nou'n anbrase
Konbyen fwa
Kot sa landrwa
Nou'n riye... nou'n reve*

*Nou'n sere... nou'n vibre
Konbyen fwa
Kot sa landrwa
Nou'n mazinèn... nou'n senmen
nou'n plenngyen... nou'n dir "zanmen"
konbyen fwa
kot sa landrwa
nou pou pase
nou pou regrete
nou pou plere
me nou pa pou zanmen oublie...*

Mon ti en Lesklaw

*Zot ti debarkè
Zot drapo ti balote dan labrin
Sa zoli lanblenm lanmitye !
Me avek premye bal fizi
Zanmi zot ti nepli.
Zot non? Gran Blan
Destinasyon... Letablisman
Aime
Latet ziska lipye.
San pider
Zot vin val nou lo nou prop later
Latristes i tortir mon leker.*

*Adye pour touzour Grannter,
 Travers dezer Losean Endyen
 San menm konnen
 Ki pou mon desten.
 Souden
 Ti briye later set kouler
 Me koko-d-mer
 Ti temwanny lekotrèr.
 Sakenn son met
 Me mwan
 Mon pa ti oule soumet
 Kisisa legzistans
 Si napa rezistans.
 Larepons ti dan sa rasyon
 Pli enpitwayab
 Ki sa ki pour koson.
 Dan mon douler
 Mon fer laprüyer
 "Paradi mon'n kit deryer
 Devan mwan i zis lanfer"
 Lakoler
 I fer mon leker anmer
 Sirtou ler*

*Zot sifok mwan konmsi bann viper.
 Zot ki'n manifeste zot meyer!
 Pli siperyer!
 Mars nennen ouver
 Pronons pli kler,
 "Au nom du Père"
 Kriy pli for,
 "Oh! Seigneur!"
 Ar wi, mon met
 Pa les mwan bes mon latet.
 Non merci
 Benediksyon sa bann pret
 Sa sekre terib deryer sa rob blan
 Fer mwan debiste
 Lyon anba lapo mouton.
 E mwan mon'n vin en orfelen sa nasyon brit
 Prizonnyen sa kouler lannwit.
 Wi yer
 Mon ti fyer
 Nwanr
 Labote fernwanr
 Nwanr kouler en lesklav.
 Me mon a les Listwar zize*

*Lekel ant nou ki ti pli brau
 Dan tou zot melimelo
 Listwar pou deuwale
 Ki mon ti en senp ero.
 Listwar
 Pour mon laviktwar
 Traizon
 Sa pwazon
 Bann ki'n soutire
 Bondye i awa zize.
 Lesklavaz wi i en viris
 Napa nanryen ki pli tris
 Me kan imen i enflize la son prosen
 Sitan malis.
 Me dan mon rev
 Ou a trouw laprev
 Atraver mon lekritir
 Ou a konpran sa martir
 Okenn zonn sovaz
 Pou anpes mwan
 Rakont mon laraz.
 Laliwa mon pran dan mon lanmen
 Mon pa pou esper lafen*

*Lasenn...enn par enn
 I'n anmenn ase laenn.
 Mon eksploze parey en volkan
 Avek pwisans
 En sel tourman
 En santiman profon
 Plito mon al zwen mon met
 Ki bes mon latet mon'n ne lib
 Pa zonn ki pou deranz sa lekilib.
 Mon ti en lesklav
 Vole Grannter
 Pour vin kiltiv later.
 Me plito lanmor
 Akoz pa tou sa ki briye ki lor.
 Plito mon azenou devan mon met
 Ki salye en zonn avek en fwet.
 Mon ferm mon lizye
 Lo non laliberte
 Mon repran mon dinyite.*